



Pou Piblikasyon Imedya: 21/12/2022

GOUVÈNÈ KATHY HOCHUL

## GOUVÈNÈ HOCHUL SIYEN YON LEJISLASYON POU ETABLÌ LWA SOU TRANSPARANS SALÈ NAN TOUT ETA A

***Lejislasyon S.9427-A/A.10477 egzije anplwayè yo pou yo mete nivo salè yo pou tout djòb ak pwomosyon yo anone nan Eta New York***

Gouvènè Kathy Hochul te siyen jodi a lejislasyon (S.9427-A/A.10477) ki etabli yon lwa sou transparans salè nan tout eta a nan Eta New York, ki egzije anplwayè yo pou mete nivo salè pou tout djòb ak pwomosyon yo anone.

"Pou New York kontinye vin pi bon kote pou travay, nou dwe kreye pi bon pwoteksyon pou travayè nou yo - epi lwa sa a pral ede fè egzakteman sa", **Gouvènè Hochul te deklare**. "Mezi istorik sa a pral inogire yon nouvo epòk jistis ak transparans pou mendèv New York la epi li pral yon zouti enpòtan nan efò n ap fè pou nou mete fen nan diferans ki genyen nan salè pou fanm ak moun koulè yo".

**Lejislasyon S.9427-A/A.10477** etabli yon lwa sou transparans salè nan Eta New York, ki egzije anplwayè yo pou yo mete nivo salè yo nan piblisite oswa afich pou opòtinité travay ak pwomosyon. Dapre [Depatman Travay Etazini](#) (Department of Labor, DOL), fanm yo te touche 83 santim pou chak dola gason yo te touche an 2020; diferans sa yo pi plis toujou pami fanm nwa (64 santim) ak fanm panyòl (57 santim). Divilgasyon yo ke lwa sa a egzije yo pral bay travayè yo enfòmasyon enpòtan, diminye pratik diskriminatwa pou fikse salè ak pratik anbochaj, epi ede inifòme règ jwèt la pou tout travayè yo.

**Senatè Eta Jessica Ramos te deklare**, "Avèk adopsyon lwa jodi a, premye Gouvènè fanm New York la ap mete an aplikasyon yon koreksyon estriktirèl nan tout eta a nan diferans ki genyen nan richès rasyal ak sèks ki kite fanm nan mendèv la byen lwen dèyè lòt parèy yo. Salè egal pou travay egal se fason nou bati fanm kòm ankraj ekonomik nan kominate yo. Pandan lwa sa a ap antre anvigè, mwen ankouraje tout Nouyòkè yo pou yo pale sou salè yo, pou yo mande transparans epi pou yo sèvi ak lwa sa a pou asire y ap touche sa yo vo".

**Manm Asanble Latoya Joyner te deklare**, "Nan chanje kilti a ak mete teren jwèt la sou menm nivo nan espas travay atravè New York, Lwa sou Divilgasyon Nivo Salè a pral asire ke travayè yo benefisyé pi gwo transparans lè sa gen pou wè ak salè ak avantaj

yo. Lè anplwayè yo pote klarifikasyon sou estrikti salè ki nesesè yo epi mete enfòmasyon sa yo disponib pou anplwaye yo ak moun k ap chèche travay yo, nou ka diminye inegalite nan salè selon sèks yo lè nou ankouraje anplwayè yo pou yo mete ajou pratik demode ki ranfòse modèl diskriminasyon sou salè yo".

**Prezidan PowHer New York, Beverly Neufeld, te deklare,** "Lè li siyen S9427A/A10477, Gouvènè Hochul reyafime angajman long dat New York pran pou mete fen nan inegalite salè ant sèks ak ras. Idantifye nivo salè yo prevwa pou djòb yo pral bay aplikan yo enfòmasyon ki nesesè pou yo negosye salè ki pi jis, epi konsa ede mete fen nan diferans salè nefas ki kontinye ap vòlè kèk travayè, sitou fanm koulè, salè jis ak byennèt ekonomik yo. Li apwopriye pou premye Gouvènè fanm New York la etabli lwa sou transparans salè sa a ki pral kreye yon chanjman ki nesesè anpil nan pratik ak nan kilti epi kenbe New York alatèt mouvman ekite salè nasyonal la".

**Avoka Prensipal, Legal Momentum, Seher Khawaja, te deklare,** "Jodi a, Eta New York te respekte pwomès li genyen pou l fè avanse ekite salè pou fanm ak moun koulè yo, nan pwolonje pwoteksyon enpòtan atravè eta a epi mennen yon mouvman nasyonal pou kraze kilti danjere nou an sou sekrè salè. Nan yon moman kote fanm nwa ak bren yo fè fas ak pi gwo diferans epi biznis yo ap gen difikilte pou kenbe travayè yo, nouvo lwa sa a pèmèt menm travayè ki pi vilnerab yo chèche ak defann salè jis pandan y ap kreye ankourajman pou anplwayè yo pou yo adopte pi bon pratik salè yo konnen ki kapab ankouraje retansyon ak pwodiktivite. Sa se yon viktwa ekstraòdinè pou Eta New York".

**Prezidan Komite Lejislatif NLEA/NY, Miriam Clark, te deklare,** "Lwa sou Transparans Salè ki te siyen jodi a pral bay enfòmasyon fondamantal pou tout travayè New York yo epi li pral pran yon premye etap enpòtan nan ekite salè pou fanm ak moun koulè yo".

###

Lòt nouvèl disponib sou sit [www.governor.ny.gov](http://www.governor.ny.gov)  
Eta New York | Chanm Egzekitif | [press.office@exec.ny.gov](mailto:press.office@exec.ny.gov) | 518.474.8418